

## lenteliedjie

Marlene van Niekerk

die poppiesnôï staan geel vanjaar  
op kleinwinterhoek se piek  
die boegoeveld is uitgespaar  
al sagter klink die waterkriek  
heuningvoël se heuninghart  
is van die geilte siek  
en jou het ek meer liefgekry  
as wat ek kan verdra  
want winter is 'n skrale lied  
en lente is 'n geil verdriet  
wat ek nie kan verdra o  
die keurtjebos groei pers vanjaar  
op grootwinterhoek se piek  
jangroentjie hik innie kiesieblaar  
van salietuite mankoliek  
al sagter snuit die winterwind  
dis boegoewyn vir lentegriep  
en jou het ek meer liefgekry  
as wat ek kan verdra  
want winter is 'n skrale lied  
skraler as 'n sneeuriet  
en lente is 'n geil verdriet  
geil soos 'n ramnassiespriet  
te geil om te verdra